

四庫全書

集部

欽定四庫全書

集部  
鶴山集卷二

詳校官庶吉士<sub>臣</sub>張溥

主事<sub>臣</sub>呂雲棟覆勘

總校官檢討<sub>臣</sub>何思鈞

校對官中書<sub>臣</sub>陸湘

謄錄監生<sub>臣</sub>施華

欽定四庫全書

集部四

鶴山集

別集類三

宋

提要

臣等謹案鶴山集一百九卷宋魏了翁撰了翁字華父邛州蒲江人慶元五年進士歷官資政殿學士福建安撫使卒贈太師諡文靖事蹟具宋史儒林傳了翁文章極富本各自為集此本乃後人取生平著作合編而成其

三十五卷下題渠陽集三十七卷下題朝京集九十卷下題自庵類稿則猶仍其舊名刊削未盡者也史稱了翁年十五時為韓愈論抑揚頓挫已有作者之風其根柢極為深厚故自中年後篤志經術造詣精粹所作醇正有法紆徐宕折出乎自然絕無講學者空疎板腐之病所上奏議亦多秉義切實誠意懇到蓋載道之言與窮經之旨醞釀而成卓然

不愧大家之目正不獨其人為足傳矣集原本一百卷見於焦竑經籍志前有淳熙己酉宛陵吳淵序凡詩十二卷牋表制誥奏議等十八卷書牘七卷記十三卷序銘字說跋等十五卷啟三卷誌狀二十一卷祭文輓詩三卷策問一卷長短句三卷雜文四卷其自一百一卷至一百十卷皆註云新增則刊行者所續入為制學文三卷周禮折衷四卷拾遺一

卷師友雅言二卷元明間集板湮廢嘉靖辛亥四川兵備副使高翀等始重刻於邛州而校訂草率與目多不相應或書中有此文而目反佚之疑有所竄改已非其舊又目凡一百十卷而吳鳳後序稱一百七卷蓋重訂時失於檢勘以周禮折衷併為三卷以師友雅言併為一卷又缺拾遺一卷故實止此數然世間僅存此本流傳甚稀今重加校定仍其

所闕析其所併定為一百九卷而原目之參  
錯不合者則削而不錄焉乾隆四十六年十  
月恭校上

總纂官

臣紀昀臣陸錫熊臣孫士毅

總

校

官

臣

陸

費

墀

--	--	--	--	--	--	--	--



鶴山集原序

藝祖救百王之弊以道理為最上一語開國以用讀書  
人一念厚蒼生文治彬彬垂三百年海內興起未艾也  
而文章亦無慮三變始也厭五季之萎薶而崑體出漸  
歸雅醇猶事織組則楊晏為之倡已而迴瀾障川黜雕  
返樸崇議論勵風節要以闢世教達國體為急則歐蘇  
擅其宗已而濂溪周子出焉其言重道德而謂文之能  
藝焉耳於是作通書著極圖大本立矣餘有所及雖不

多見味其言藹如也由是先哲輩出易傳探天根西銘  
見仁體通鑑精纂述擊壤豪詩歌論奏王朱而講說呂  
范可謂和順積中而英華發外矣後生接響謂性外無  
餘學其弊至於志道忘藝知有語錄而無古今始欲由  
精達粗終焉本末俱舛然則言之無文行之不遠亦豈  
周子之所尚哉此予於鶴山公之文而重有感也南渡  
後惟朱文公學貫理融訓經之外文膏史馥騷情雅思  
體法畢備又未幾而公與西山真公出焉予生晚不及

見考亭之典刑獨幸接二公之緒論歲在丙申公假督  
鉞道吳門予時兼制置之事故讀公詩文為尤熟公沒  
十二年而近思近愚公之二子也萃遺稿刻梓用傳屬  
予序之竊惟公天分穎拔早從諸老游書無不讀而見  
道卓守道約故作為文率深衍闕暢微一物不推二氣  
五行之所以運微一事不述三綱九法之所以尊言已  
必致知力行言人必均氣同體神怪必不語老佛必斥  
攘以至一紀述一詠歌必勸少諷多必情發禮止千態

萬變卒歸於正及究其所以作則皆尚體要而循法度  
浩乎如雲浮空而莫可狀凜乎如星寒芒而莫可干蔚  
乎如風激波而皆自然也其理到之言與其有德之言  
與程張之問學而發以歐蘇之體法與公文視西山而  
理致同醇麗有體同而豪贍雅健則所自得故近世言  
文者曰真魏要皆見道君子與公早掇峻第晚踐政途  
然身未嘗安於朝廷之上使得行其言以措諸用如藝  
祖之訓而用之詎止如今所存者而天不假以年故所

可見者文而已惜哉淳祐己酉夏宛陵吳淵序



欽定四庫全書

鶴山集卷一

宋 魏了翁 撰

古詩

寄題雅州胥園

胥君頎然來錦囊背奚奴探囊發詩卷一一卿大夫未  
識胥園面詩卷自畫圖掃石卧竹影長鋪斲芋區胥君  
於此時林泉傲金朱懶余本丘壑誤被塵纓縛每逢漫  
浪友慚愧紅塵脚會當尋茲盟酬此一大錯

登萬象樓和計次陽韻

塵纓羈我身對景慵着語青山喚倚欄壯氣臨潁汝層  
雲卷油幕萬嶺眇煙縷酒闌一橫笛樓前葉自雨

贈章相士

我本三生人寄身軟紅土方困京華老誰識新豐旅稠  
中有章生道周忽會顧謂余有奇骨往往私告語許予  
兩無心邂逅適相遇聞余趨集英一聲聳臚句自謂吾  
術神誦言詫儔侶我無百金裝生無箕帚女泚毫賦此



詩為生郵梁楚

和虞永康美功堂詩

我魯寄徑城南州果店纂纂香浮浮雲開千仞雪山白  
月照萬古滄江流我時未得江山意但愛高明甲西州  
十年重來是邪非獨覺真意爛不收虞侯美堂發幽悶  
豈但清與耳目謀川流衮衮來不斷雲物疊疊生無休  
既從靜壽識至樂復於歎逝希前脩遊人翕翕蒲江頭  
隨所適處心悠悠童子長佩褰江離女兒縫裙學石榴

沒人揚波白魚躍舟子競渡蒼龍樛田翁野婦看兒戲  
詠歸山暝風作秋固亦有志感時節欲起湘纍問靈脩  
人人得處自深淺江山於爾無顯幽堂上主賓亦復爾  
各各會意風冷颼宇宙無窮本如此我亦皓然希天遊  
次韻史少莊竹醉日移竹

豔豔酒粧闌姚魏冥冥花影逢石丁醉生夢死何如竹  
三百五十九日醒

清如杜叟日卓午直似姜公詩作丁冰雪容顏儼相值

霸陵醉尉也須醒

平生自許歲寒操  
醉日移來三十丁  
底事此君亦移轉  
連朝風雨喚教醒

猩屐常為醉魂役  
驪珠適與睡時丁  
外物移人每如此  
人心可使不長醒

虞永康生日

良知誰不有  
靡究復靡屆  
寸心日月明  
萬里天地解  
握機洞消長  
觀物了成壞  
推行濟四海  
小試未為隘  
姓名

金匱要略卷一  
既轉聞正恐世網挂相期久遠看力與支未泚建立天地心透徹義利界即茲奉君壽行矣良自勸

安大使丙生日

往年天壓西南陸妖氛內訌胡塵飛烏狐陸梁士扼腕蜀山慘澹無光輝公以空拳嬰乳虎漠漠黃雲闇平楚直將天理感人心徑斬賊頭報明主露布東馳人嘯呼京師觀者環儲胥天顏有喜近臣賀大官高爵來須臾中興以來幾變異宗社之存如旒綴平江羽檄走凶雛

采石歟船戮狂獬至今勛名滿華夷與公鼎立書旂曩  
公方退然不自居憂國之鬢紛如絲天之生公為社稷  
南山不蹇石不泐願公蚤歸相天子赤舄晨朝容几几  
次韻叔衍兄賀生子

一壑一丘耕且為不歆周網應非罷雲霾障日樹蒙宓  
草蔓漫天山蔽虧生意正從芽蘖露善根不逐斧斤斯  
溶溶此理誰能解賸喜吾宗有白眉

錢章郎中燮以浙東倉歸湖州

武陵城中春事濃  
棟花欲開未開風  
常平使者謝朝列  
袖有英蕩吾將東  
披孔翠裘上馬去  
錦韉煜燭三花驄  
先攜令名作卿繡  
却把仁念為倉紅  
世人機淺嗜欲深  
便從扶木窮高春  
朝余蒼梧夕縣圃  
何似緩轡搖冬瓏  
曩余除官本同署  
至自萬里驚燕鴻  
諸公祖筵亂平湖  
復我不往心忡忡  
君今姑為粵人行  
明年歸朝儻及同  
送宇文侍郎紹節知廬州

和戎八十年尺箠不施寸  
彼方玄黃篚此但清紫楨懷

榮保妻子是固人所賤或者倖邊功橫行請十萬問學  
不素講利欲所薰懣紅旗與黃紙勇怯無定論淮浦唇  
大江九重重分閫省臺少常伯忠孝在寢飯帝謂吾先  
正嘗遺蠟書恨汝今其聞孫未報君父怨九旗下青冥  
往為忠義勸再拜函祇命當仁不敢遜黃金絡馬頭茸  
纛立憲憲先聲劇塞垣虜師不足遁隣里會方山疎余  
且有獻裴相昔守淮董師征洄鄆兵端寔蔡啓深入非  
始願況今狃承平士氣方曼曼民力苦剗創帥債未折

券如弱者禦盜高墉守關捷破羌趙營田勝楚何繕堰  
但當強精神勿與角勇健功名不入眼兩鬪待其困却  
攜令名歸太平待公建

題蔡氏叢桂堂

誰銜鷲峯種託根蔡氏堂勿誇鄰林枝未說燕山芳君  
看湘江上千載留晶光但當護根本歲晚寒幽香

送徐校書知處州

我我海中山十二樓五城僊人駟玉虬徑上凌紫清中



道忽回薄珪符下玉京彤幃曜白日錦輿上頭行扶桑  
攬余轡緩步寬作程世間行已地端亦勝蓬瀛誰乎低  
着身啞咤聞新鶯何如攜令名歸以見母兄用世無小  
大千里亦民氓小施五袴手竚錄屏風名

送王考功聞禮江東漕

分部設將漕薶旒寄聰明直須撼山嶽亡但採畸羸而  
況江以東襟淮翼吳荆民力九十空所恃人為城南宮  
輟望郎方輸餉連營熒煌鵲錦袍明日趨遐征陽春脚

未到淑氣先流鶯向來嵇中散僅試薶九京阿兄亦未  
究有書今在楹驅車踏前軌若木以為程千里隔香案  
洗目觀澄清

送宋常丞德之知閬州

十年痼丘壑厭食青山薇不作時世粧短褐懷明璣出  
門歌一曲聽者魂為飛方騎將軍馬旋闔師氏闥清名  
滿雙宇區畫裨樞機寧甘障俗塵不肯緇素衣一朝典  
儀叢雲步方峨巍顧懷錦屏勝見謂天下稀彤幃下青

冥驄馬黃金鞵假道淅以東袖有四明歸我來今二年  
幾度與客違名位偶君似臨分重依依風節耐歲晚富  
貴倏晨晞相期久遠看努力踵前徽

送黃考功赴廣東運判分韻得漢字

涼風厲蕭辰秋事已一半同舍多望郎萍聚復雲散得  
士良苦艱引去何浩瀚日日送行人青衫浹流汗其間  
白石翁清廟之圭瓚器采儀周行詞章輩楚亂秘丘第  
一官脩途日未旰掉頭不肯住持節下霄漢草木識清

名風塵入長筭安得此老宿為世洗愁歎同省並門居  
昔我綴華貫高標壁千仞臨分重嗟惋相期紹前徽歲  
晚堪把玩

送曾尚右從龍知信州分韻得州字

長安十二門冠蓋如雲稠浮驂不停趨九衢滔滔流朝  
握扶桑轡暮行背椒丘駕言往從之道左傷吾輶溫陵  
有佳士清姿秀琅球蚤疇掄魁望盛名蓬瀛洲榮進付  
膜外寡欲自日休需章臣有母自詭以一州彤幃下青

冥錦輿居上頭小施活國手彫瘵會有瘳同省並門居  
昔我陪清遊一時四同年氣味骨肉侔而君堂堂去別  
袂挽不留迅商起層旻候垂催功裘問學常苦艱歲月  
忽忽道古今同一岐古豈真難儔願言事撫綏勿作刈  
獲謀會面豈不再為君刮雙眸

追送劉侍郎甲以寶制帥湖北

士從西南來落落僅八九半年北門道幾度酬別酒清  
朝志興復第一廣英穀采采不及掬引去遽盈斗矧今

忠肅孫卓犖漢庭右清渠儀班行高懷局宇宙居然轍  
通聯亟懷荊州綬思章陟西祀戎鉞炫春晝世間行已  
地隨遇皆不朽着意護本根虛懷閱忠厚上游屹長城  
歸來秉機宥

送程左史驤以右撰知夔州分韻得重字

煙草暝江湖霜風纈郊壑黎明北門道雜遝冠蓋擁程  
侯倦左城引去何太勇瀘江春信回書殿星極捧帝念  
夔子國側耕地荒茸吏飢餒賦政煩室罄小人恐申命亟

移麾邀驅母上冢彤幃下霄漢環珮鏘壁珙山川洗悽  
戚草木企孤聳芥斤刈伐餘急與護把拱古人為已學  
非以博華寵事業貫千載富貴不旋踵願言樹風聲永  
作蜀山重

題謝耕道耘一犂春雨圖

床頭夜雨滴到明村南村北春水生老婦攜兒出門去  
老翁赤脚呵牛耕一雙不借挂木杪半破夫須衝曉行  
耕罷洗泥枕犢鼻卧看人間蠻觸爭

送陳大著晦知蘄州分韻得輝字

陳侯海內秀滿腹貯明璣十歲能屬文提筆登王畿上  
嘉魯論對亟授九品衣二十躋膴仕昱昱五采翬三十  
蹇殊科尋闕師氏聞四十復見徵雲步何我巍蓬萊三  
千丈徑上陵紫微顧懷蘄春勝驄馬黃金鞵我來今二  
年幾度與客違於君再為寮臨分重依依風節耐歲晚  
富貴特晨晞前後繼二呂迄今借光輝相期久遠看努  
力追前徽



題石興宗

振讀書巖

巖扁魯直所書

巖頭橘樹經百黃三少不生諸老亡只餘石間元祐脚  
谷虛盡日鳴松篁

送趙編修

大全知眉州分韻得登字

炎燁爍穹昊火雲助其烝冠巾拂塵土庭戶喧蟲蠅便  
面不停舉况欲填吾膺其間寂寞人隨念生涼冰涼意  
方未透一夕三四興造物解人意如呌呼得應越鄉萬  
里回令名作先登固知栖栖者得喪初何曾賢者於本

朝曉宿垂觚稜今日送樞掾明日辭禮丞采采不盈掬  
引去何如陵百憂結中腸坐挑短檠燈

送范吏部

子長

知崇慶分韻得兮字

陽明迪性分陰濁生塵泥蛟龍薄九空高逝縹緲兮使  
可繫而縶何異犬與雞長安有狹邪曲曲復低低主人  
笑延客雲棧登作梯客辭以未能所憂困多蹊乞麾下  
霄漢萬里騎青霓去留本常事渠不喪所齎秋風鏘珮  
環家在天之西歸來拜三祖歸路幸不迷

送蘇大著大璋知吉州分韻得章字

平生蘇太史清姿秀球琅異時玉堂對歷歷漢興亡直  
作根本慮不懷棄捐傷脩名望蓬島軼軌扶桑中道  
忽回薄飲馬以相羊昔為同年友今為同舍郎不肯三  
日別况各天一方我乞漢嘉綬君懷廬陵章我無百年  
關君亦千里翔懷賢慨時事百憂結中腸願言保嘉猷  
不愧歐公鄉

鶴山集卷一

欽定四庫全書

鶴山集卷二

宋 魏了翁 撰

古詩

送周架閣南以浙東提幹歸平江

共惟仁義心無賢愚聖狂紛紛萬弓箭獨以寸鐵當毫  
釐有不察居然失其鄉察則我固有而失豈真亡周君  
海內秀清姿競球琅牛刀十九年猶顧善而藏用世無  
內外意行獨安詳乃知且晝物特為弱者彊許時京塵

中邂逅兩匆匆前日同李郭他日盟范張豈謂客逢客  
乃或得相羊此道日寥落此意誰平章為人作生活悠  
悠老扶桑勉哉迪嘉猷歲晚垂令芳我亦從此去後會  
丘之陽

題沈氏書堂

吳興沈聲甫示我書堂圖枕松被脩竹帶江襟浮屠堂  
上新牙籤吞天祿石渠出受山水謁入與聖賢俱兒輩  
紛華悅子獨文字娛是心儻無數已足光蓄畬吾聞學

者事窮理以返初為人祇禽犢鑽紙成蠹魚勉哉師友  
功千載沈氏書

次韻德先步月答所問語

三更端正月皎亮直瑤京客問心之體無言對太清  
夜景湛虛明浩然無與京如今蘇氏婦但指聖人清  
霽月光溢浦吟風歸洛京迴無纖霽翳千古識真清

次德先韻

二氣同一根本體浩兮淵可見川上逝未發心下泉真

機亡停息果剥根長鮮定理亡將迎塵境地自偏形神  
既外發何者操其權芸芸萬感通存處元寂然一物一  
太極不間大小年隨處無虧缺并居而用遷至人配天  
德知周物之先學者事何事省察於眇繇

次韻虞永康剛簡廬居生芝

河南富貴花人與譜姓氏惟茲三秀者不譜亦名世肖  
形草木均出處哲人似無然而致之朝茵何異此廣陵  
張氏廬厥應繫孝祀新豐李興瑩脩柯晚白紫意誠物



皆誠人瑞草亦瑞蕭條羌水瀕五子服喪禮松壑侑夕  
悲竹牕湍曉淚根基由內心樸實無甃砌一朝堊室左  
五色芝蕤蕤乃知宇宙間何處非實理誠神本同機應  
感不失儷充周徧範圍存養司諸已是心一息妄目接  
猶虛偽若曰信機祥我亦為祝史

韓叔冲約客泛舟滄江分韻得落字

落日放船  
好輕風生

浪遲  
杜句

炎煒避無所意行出東郭客以聲氣聚舟於樹泉泊江

動雲意閒林幽鳥聲樂山川孰流峙鳶魚自飛躍天分  
隨所適豁然無空濶有客猶謂余底處認真活是心無  
間斷本體自呈豁一笑各會心星河挂碧落

贈僧祖淳南游

吾少不學佛吾道聞之嘗虛靈一寸心無賢愚聖狂人  
惟不自信渺渺岐上羊師今緊尋覓看是真有亡如行  
人貪程如久客念鄉一朝眼發明家山儼成行

寄李考功道傳

虛靈天地心  
亶亶萬化機  
幾形有動靜  
誠盡無顯微  
人惟不自信  
稷顏有相違  
居人憚寒暑  
遊子行不歸  
誰知炯然存  
彼物乃吾知  
高人真畏友  
聖賢吾師師

和李致政花石山詩

春風挽征衣  
淑景薦邁實  
山中之奇觀  
變態紛襞積  
或劃然以舒  
或蒙然以密  
或嫵如修眉  
或突如巨迹  
或驚鳥將搏  
或遊龍偕出  
一目百奇怪  
隨景發詩癖  
江山昔豈無  
萬古閱閒寂  
而獨陳於今  
洵我風月筆  
便如遺俗

士高卧天一壁人知匪自獻不知亦奚恤

次韻黃侍郎海棠花下怯黃昏七絕

狂風利劍戟火龍困屠宰莫起落紅愁生意浩雲海  
曾訪郊原春靜觀煙雨妝因物得良晤諒非昔如常  
唐人春深題用韻工車斜逐逐語言去誰歟真識花  
臨川數落花康節愛花謝若作榮悴觀此特花之下  
穉綠茁兒拳老紅面白摺詩壇更伏波令我逢敵怯  
天運自消息詩人費評章何花春不紅何草冬不黃

醉妃索南內玉奴斃東昏所以觀物心皇皇妙無門

題劍門

江有瞿唐限陸有雙劍蹲如熊羆當道如虎豹守閭屹  
然東北隅莫此西南坤昔歲在單闕白日塵沙昏人心  
不足倚恃此兩長垣舟車之出入筦鑰有司存御艫下  
魚腹委轡充劍門藪逋乃如此天險何足言況於多蹊  
隧不逮昔所聞烈烈張睢陽英英顏平原古之善守國  
人心以為藩

題大安軍楊寶謨旌忠廟

范陽一夕輦鼓鳴莽然河朔惟孤城姓名徹聞帝猶謂  
我乃不識顏真卿人才所用非所養自昔然矣奚獨神  
肘間銀黃挂三組腰間犀玉圍萬釘養癰護疾皆此輩  
事危先及城郭臣求仁得仁性情正可死無死分義明  
豈徒一時折羣醜將與萬世開太平我嘗辱交於神者  
寤寐精爽如平生過祠邂逅日端午昌歎之酒芬兮清  
要呼湘纍徑同醉毋使二子稱獨醒

出劍門後日履危徑戲集轎兵方言

籃輿陟險隘兀兀不停輟主人眩頭目僕夫困唇舌前  
疑樹梢拂後慮崖石擦方呼左畔蹻復呌右竿捺避礙  
牢挂肘衝泥輕下脚或荆棘兜挂或屋簷拐抹或踏高  
直上或照下穩踏斯湏有不審僨輿在目睫深淵固可  
畏平地尤險絕作詩告僕夫審諸秋毫末識察既曉然  
力行謹無忽

過大安軍黑水阻漲憩崇道觀以需漲落乃濟

川遊不停息雨集有滿除卓哉鄒魯臾即茲驗功夫

寄題王才臣南山隱居六首

莊敬日強齋

天以行故健火以宿故旺卓哉主一翁絜我洙泗上

格齋

水非石之鑽索非木之鋸一日復一日會有豁時處

南谷

我行半天下夢不到南谷健讀諸老詩劃見真面目



竹亭

西山抱孤潔淇水凝寒綠古來長安道多少閒草木

松庵

受命獨也正歸然十八公人獨匪正命胡然不如松

腴亭

膏雨炯晨沐和風照春睡誰與驗其機葵軒一腴字

謝安大使丙見遺白玉環

寶刀切寒玉解作環無端連蜷虹貫日晶潤晴生煙帝

省岷嶓下冠珮人間閒迺飭坤之靈效貢窮山淵不以  
他物效以是期公還維公倡德意地寶弗敢利玉汝不  
汝瑕來墮玻江前因思取予義僑也辭韓宣落落竟弗  
合而此微求旃服之報安所我無青琅玕圭復以為謝  
不踐如斯環

送二兄三兄赴廷對

吾家令兄弟異氏而同氣雅知義利分不作溫飽計天  
子龍飛春了翁對軒陛柄臣方擅朝黨論如鼎沸輒輒

不能休一揮二千字植治貴和平用人戒偏陂天子擢  
第一期以風有位尋置之三人仍詔恩禮視後此者三  
年東瞻復睽第天子方諒闇有言不得試歲行在協洽  
文翁陳讜議惟知守家學寧顧觸時忌雖不第甲乙自  
謂儻無愧古人為已學何有於富貴窮則獨善身仕將  
以行義兩兄西南彥九牧將倒詣平生剛直冒毋以科  
舉累矧逢主聽寬寧復懷顧畏厥今果何事請略陳一  
二內無王文正誰與理家事外無韓忠獻誰與整戎備

金方人卷二  
卷二  
熒惑守羽林震雷訖冬瑞天象已云然人事猶爾耳  
劈析為上言卓哉朝陽喙卻攜令名歸為親一啓齒

次韻虞果州剛簡泛雪

黃雲變黷風雪天欲之霸橋尋浪僊爐中楫杻繫寒客  
縱欲燒愁能得然撥灰嚼句不忍吐竟日南望雙眸穿  
誰知詩來亦念我字與六出爭明蠲美人美人呼不來  
昭華吹怨樓西偏況有山頭月為友觸撥煙痼撩詩顛  
豈無詠絮謝家集亦有閉戶袁安眠未如山中之至樂

白玉世界天相連朝看夜聽雨奇絕靴霜爐雪知誰賢  
褰裳急理剡溪棹明月已傍羌江還羌江白雲遶親舍  
北山夜雨鳴清川世間真樂不易道此以意會非言傳  
惜哉往日不可再江頭望君如望年研斲筆凍不成報  
夢中書劄來翩翩

約眉之寓公飲郡圃梅下分韻得動字

窮陰彫殘年小雨維寒凍野迥山色枯木落天宇空殷  
勤玉雪友歲歲管賓送孤標耿黃昏清艷橫蠅螬從渠

忌皎潔孱顏立孤聳半年簿書塵閒殺果下鞚林端劃  
見之撩我潑春甕芳菲惱不徹喜與良友共花光留夕  
陰鳥語憂清哢羣芳去無蹤生意正湓涌因懷武陵日  
歲上西湖冢粲粲萬玉妃蕭蕭守翁仲誰知落天涯惠  
然復我從暗香疎影句為我作詩供心事炯如霜客遊  
恍成夢歲窮萬物息誰此役羣動會取春風心處處得  
日用

虞知府剛簡生日

皇天覆后土藐然吾一身職職萬同宇何所非吾仁人  
惟不自信私意橫紛綸君侯覽厥初渾渾川無津百家  
之精粹六藝之芳醇挹之未厭歟欲以警此民天機行  
日月大戒明君臣一源顯微貫萬象曉晦新焉知我為  
我聊以人治人胡然閔厥施膏澤猶其屯意將楫所養  
切磋及茲辰余也我眉陰君兮滄江濱生生共茲意不  
隔江山春懷哉寧無車有繫未可申

王總領鉛生日

古來五大不在邊國家長慮初解絃西南計臣授鉞  
獨以一手擎半天三邊將士趨節制百城吏民服威惠  
載宣寬詔問無恙扶藜往聽翁顏喜我圖爾土居未怡  
室家僅葺風雨欺波濤沄沄逐風靡山色澹澹憂陵夷  
機空絡緯那可織徽穿虎豹疇能識秦門夕燧雖平安  
燕帳秋弓未休息翁顏且喜舊觀還尚恐世事愁無端  
祝公為民久遠慮憂願期使西南寬美官厚祿等閒耳  
得君得時不易然君不見富公在青州多於中令念四年



重陽前一日約寓公飲于新開湖之西港有歌  
詞者其亂曰會與州人飲公遺愛一江醇醪  
遂以此分韻賦詩某得一字

吾州遠景樓壯哉天下一下有千尺湖長虹倚斜日煙  
雲紛蔽虧草樹互蒙密人既位通顯湖猶困遺逸一段  
雲錦機割截不成疋我來劃見之慨然為拈出凹者豁  
以舒凸者疏而溢乃取半山句以榜湖陰室晨舟亂平  
渺日晏未云畢客喜以問余幻成子何術余非襲而致

彼有是良質牛山木嘗美茅徑人自室一笑各會心涼  
風送蕭瑟

次韻李參政壁湖上雜詠錄寄龍鶴墳廬

龍鶴在吾西昔年班荆處乃今五斗米繫之不得去冬  
夜那向晨斜河耿高樹

木落天宇空野迥江水碧誰歟驅四運昨夕復今夕君  
看瀛海內壽考匪金石

聖死微言湮千載迷津涯浮驂徧八極日暮猶伊鴟大

道如掌平人苦不識家

南山高崔嵬草樹蔚喬林雲橫日曛曛蟬鳴谷陰陰  
然丹鳳味為我作好音

西山有佳人慣踏山下路晨吟澤畔雲午睡巖前雨  
莫使兒輩覺奪我林壑趣

仲尼趨聘召季路奚不憚分量固爾殊何傷於遍歷  
自揣或未能莫如只堅白

皇天平四時先春而後秋寒威奪仁氣慘慘紛百憂  
康

世非我長自許以一丘

古人為已學不以遇不遇學問思辨行止定靜安慮次序固曉然人情苦傷遽

百年狐兔窟汙我黃河流槃槃帝王州僅與甌脫侔秋風壯夫淚禾黍莽平疇

江左憂佛狸荊州忌老瞞既虞薪下火又恥泥中蟠不虞復不恥志士寧無歎

大亨惟同人小知僅私已皇皇萬井封耽耽百重陞爾

病寔余恫須知本同體

南園鼎盛時紛紛車馬跡須臾風景異樹老春寂歷盛衰那可常此理最明白

世有傀儡棚帳幙深遮圍衣冠巧裝飾觀者迷是非自謂真好手不知若為歸

續和李參政壁湖上雜詠

陰陽互推移氣數有信屈澗松發貞姿庭梅醉生色雖無桃李容依依保終吉

氣力與運頹十步九蹉跌聞有用我者掩耳忽不悅吾  
非嵇康徒道遠未能涉

虛靈一寸心攻者十七八炯然無常存精粗皆著察衛  
丘駭牝蕃魯圃牛羊茁

古之求仁者信道不靳獲顏生何所樂寧蹈飢寒厄能  
知四勿功六根本非賊

嚴君閑有家富之以其道幾年困外禦囊空甑復倒家  
人良自勉歲晏願相保

晉當胡運衰厲世先黜陟當時望塵友有識所憤疾云  
何祖士稚不似劉越石

人心不可期好好而惡惡利欲怵迫之本心日以落所  
以古之人憂在晉其角

西郊訪梅約李提刑

堅

李參政壁八客分韻得

爾字

荒煙散牛羊落日下城市天寒萬木脫歲晏羣動弭西  
郊有孤芳獨喚春事起幽光耿參月清艷明野水欲開

未開時似語不語意或疑春較遲的皦尚霜蘂誰知春  
風心渾在阿堵裏洞霄逍遙公九隴花月使領客居上  
頭蹇予亦婪尾頗懷去年遊歲月如許駛悠悠竟何成  
揔被物化使索酒浮大觥歌商曳窮履真意浩無窮作  
詩聊復爾

梁運判綸生日

有歌不必歌吳趨有舞不用陳巴渝試聽天下紫雲曲  
着意自與人間殊益州刺史梁大夫高冠長珮鳴清都



秋原方集迎車雉春風欲送升平鳥却思忠獻海棠處  
少日曾此扶親輿問天乞英蕩叶氣為先驅有酒皆卽  
清有書皆父腴人逢善旦稱吉祝六引三調何虛邪勿  
言商聲苦太勁為國綱紀正要渠厥今事勢將何如隣  
家盜起翁無襦乘風縱燎未渠已我薪未徙屋未塗天  
之生賢端有意正治況是公規摹儘將吉德為壽本扶  
桑自昔無榮枯

貽廬陵術士馮椿

月宿南斗韓愈生歲在己辰康成死二人言命是邪非  
我欲質疑於孟子

浣花即席


輕颼濯袪暑清與耳目謀江山新客態真意爛不收傍  
人以戒余將事東郊游川后且靜波馮夷亦安流聯鑣  
載羣彥駢筵駕方舟月中亂平渺高春尚夷猶俯瞰大  
江橫仰看蒼雲浮滔滔去不息亶亶生無休俯仰三太  
息發我心悠悠未省昔之人曾有此樂不團團轉蘭柁

突見龍棹頭聞然兩敵國蒿矢迅不留所爭何為者對  
面如仇讎少須遊人散天暝風冷颼清興浩無極洗醖  
更勸酬

再和浣花韻呈李彭州壁李參政壁

輾然一開口天也非人謀江山自舊管風景仍新收一  
門令兄弟而我從之遊衛玠珠玉側李膺神僊每主賓  
有良晤兄弟無相猶雨餘白日靜江遠青天浮相彼宇  
宙廣覺我心休休世傳浣溪女聲跡疑謬悠靈均亦已

遠英烈今在不又懷唐拾遺泯然哀江頭陵谷幾變遷  
屈孟獨長留於此本何負而以德為讎因時慨前哲坐  
久風颼颼良會惜難再作詩以相酬



鶴山集卷二

欽定四庫全書

集部  
鶴山集卷  
三至五

詳校官庶吉士臣張溥

主事臣呂雲棟覆勘

總校官檢討臣何思鈞

校對官編修臣楊壽楠

謄錄監生臣戴塤

欽定四庫全書

鶴山集卷三

宋 魏了翁 撰

古詩

送趙茶馬師劣東歸

又因送客朝京闕  
行行偶過山之陽  
檻開岷嶺半天雪  
簾捲峨眉千丈岡  
斷霞晴空暮江白  
密陰藏雨秋原香  
客歸便可報明主  
滿川看看飛雲黃

李參政壁生日二首

湖淺霜雁寒天高老龍蟄悠悠瀛海間時運遞消息  
黃鐘一龠洄槁瘁亦敷澤茹茅趣連征瑾戶同一闢  
向來屯陰地有果終不食存之廼天意斯道古根極  
公論無消磨物情自喧寂喧寂安足計秋雲卷無跡  
請公護景光春事勤種植明朝揆初度萬象好顏色

至後  
一日

二年老翁泉親酌石林壽林翁硬如石跌宕杯舞手酌  
顏照湖山麗藻濯花柳牛頭望墓顙隔澗幾煙岫江梅

驛堪寄湖水觴可侑林丘一曲間事業千載就屢空有  
真實萬變無雜揉用之還帝師歸則赤松友蟠桃堪一  
嘗世味不同嗅得書方醉歌癡絕記前守

次韻郭方叔諸公偕胡致堂賞梅至夜賦詩

玄陰作秋冬殺氣寓風雪土深候蟲閉山靜飛鳥絕誰  
知無邊春萬古長不滅或暢然以舒或凝然以結或聚  
為融和或散為騷屑又嘗以此觀諸人生意不斷長如  
薰咸陽宮殿氣成霧忽作芒碭山澤雲神爵甘露來紛



紛畫堂已入王政君人從動後觀變態誰於起處探網  
縕淺者若為見夜氣長如神儻知起滅幻便省消息真  
如何天機之淺者但識人間桃李春

次韻劉左史

光祖

玉亭觀梅

南山有佳境天作而地藏誰其搜抉之主者今歐陽時  
當冬候最靈黷雲無光爛嚼暗香句浩歌黃竹章詩成  
物有主意遠天無旁衆賓從老守遙林拱孤芳氣味自  
爾殊凡卉不敢香芸芸天壤間何草冬不黃獨此冰雪

質老氣磨蒼蒼便如身潔人易知復難忘頗懷熙豐日  
羣妍偃冰霜皓然深夜老春風貯肝腸扶開第一機還  
作桃李鄉終然和鼎實以侑千歲觴三嗅幾而作臨風  
倍輕狂

題潼川倅廳先得月樓

濃雲捲幕衡嚮北天風不搖萬響息墓行爬沙踏科臼  
顧兔茫洋長在腹本來全體自分明日用其間人莫識  
弄丸之暇劃若逢笑拍闌干我先得

和宇文漢州

闕

乞房樓記詩

房公曾中妙刀尺剪刻玻璃貯寒碧今侯着樓於其上  
竹色荷光得良覲詩來殷勤問故侯別日雖賒情轉密  
因思當年飛蓋遊鷗鷺不驚潛鯉出春濃雪絮人影亂  
秋老雲松半天屹蘇公二十四橋月尚愛西湖風月夕  
江山好處餘戀繆縱不即人人自即況今簷撩雲與齊  
激楚高歌友朋集向來寒乞翻自嗤詩掃黃泥已無迹  
功名老我後加鞭文字餘人先奪席欲搜萬象供刻畫

自有此湖難此筆終當為君記斯遊摹寫蒼顏真六一

約許侍郎奕諸公酒半宋正仲德之至自都城

人生能得幾回別一別公來四千日我騎紫馬出行春  
公指黃扉入當夕誰知行止不關人邂逅天涯復同席  
方看紫陌爛紅英忽復濃陰潁青實斷霞明白日靜  
過雨穿林亂雲濕如夢如夢夢邪非曰歸曰歸歸未得  
棘南山岸東流斷關西雲霾北風急酒逢故人一吸觴  
語及新事百憂集試問吾歸將何歸梓州遂州有何擇

況有青山老居士千騎東來闖然入更得可人高帝孫  
又忻未至臨邛客儘判三日作狂醒要話十年曾幅塞  
登元祐閣次韻李左史臺所和范瀘州子長詩  
飄風吹面酒無力萬響搖搖不停息主賓巉然立分鼎  
抑抑威儀長不忒冰槃時薦櫻筍香烏絲快洒薔薇墨  
夜深山靜天四垂悠然發我真聞識

臨川過椿年永叔植慈竹義木於庭廼榜其堂

曰慈義索余詩

冬笋與霜董孝可使之生老槐與枯荆義可使之榮芸  
芸天壤間何物非吾誠根心貫芽枿影響於形聲過君  
資孝友早識真重輕一時東南彥意氣何相傾虛几隱  
天籟深居觀物情慈竹吾父子義木吾弟兄夜簷月送  
影晝戶煙輸晴與我一般意乃作堂堂名竹根頭皦皦  
下覆復上承木以同本故葉葉皆相親承覆匪強合相  
親誰使令茲有靡不有斧斤日丁丁願言厚封植歲晚  
長青青

潼川憲司拓圃築亭取康節語各以四春得古

詩十二韻

皇天平四時不以秋先春仁人奉天職不以德後刑次序固云然表裏元相因方春布陽燁萬物皆精神當秋乃摯歛黃落山川貧天機之淺者榮悴為戚忻誰知天地心於此常肫肫既嘗驗諸理又以取諸身四德孰非元四端孰非仁刑威雖時用生意固長存四時長有春吾聞邵子云觸事識初心乃以名吾亭

遂寧社稷壇與風雷雨師之壇混為一區其間  
多悖禮者某偶攝郡事因為隨事釐正

始余求諸社窮巷窈而曲草陰荒蒙茸林影亂樸櫟其  
中有屋廬其下主以木社稷風雷雨皆於此乎告趨閭  
不求陽如叢祠而局就簡不辨方如古墓而族引我拜  
乎上高牀被茵褥使我視所陳紙幣荐薌燭爵不以坩  
寘酒不以茹縮牲不以碑麗齋戶不以宿於禮無所稽  
承訛已云熟從之則咈余不從亦違俗是心既不慊雖



暫亦為瀆屋不受天陽此豈容有屋先易其甚者餘事  
踵相屬其有不逮為則以告新牧

次韻張太博方見貽二首

嘉定己丑間郡守張  
方治印墨刻尚存

門前車馬塵滔滔試問有誰閒似我夜燈照出千古心  
曉牕掣破重玄鎖

別後幾如隔世人閒中認得當年我清風應傍笑談來  
明月不隨門戶鎖

再次韻

眇觀千載苦無人窺見一毫先有我雋敏既為文采誤  
高明又被玄虛鎖

我嘗妄意於古人子今用力苦先我安得從容長似今  
借子玉匙發關鎖

次韻張太博方得余所遺二程先生集辯二程  
戲邵子語

文字未科斗圖書未龜龍粲然天地間此理觸處逢是  
謂象之祖而為數之宗昊犧古神聖先得人所同文因

而繇之亘古亦並雄訖于我孔聖天命滋益恭渾然一  
理貫密察而從容辭變與象占四者固所崇推辭以知  
變象占在其中荒荒秦漢後學者昧所從不以災異會  
則以虛無通天開周程子易道乃復東動靜靜復動終  
始始而終上承千年緒下起百世風同時有邵子講道  
于伊嵩天地之運化陰陽之無窮即物驗消長先幾知  
吉凶邵子知道數獨立幾無戒詩助也見二程自周孔為  
時開夢夢其歸則一耳昧者結忡忡學之將柰何矧余

倍顯蒙要知羲皇心須踏周孔蹤

虞萬州剛簡生日

春風吹我游錦官客眸飽作滄江觀鶴飛自由白日靜  
山來不斷平野寬主人聞客倒屣迎案頭點易朱未乾  
速呼朋儔俾接席又遣兒女來拜前館中列鼎食客衆  
堂後鳴鐘聚指千客來輒留張坐飲客醉復與開榻眠  
主人投閒六年久祿廩不繼胡能然問之主人笑不言  
神情散朗心常閒向來曾於我乎貸至今尚質黃金盤

又聞吾兄市橋尉假五十萬青銅錢橐中似爾空亦屢  
門外車馬紛闐闐其間猶有不知者誤謂公子非儒酸  
誰知出分本無幾况復奉賜隨分班知之不知吾何恤  
日用飲食於其間西京相裔平通侯輕財重義無敢先  
三年田家未云久便懷富貴譏南山節侯有子韋少翁  
亦以明經世其傳爵之附庸有何薄徑欲忍愧從夷蠻  
人於居約視所守又以久近察所安近而不渝儻可勉  
久而無怨良獨難不須遠求漢諸公姑復近攷今時賢

雖云暫間未嘗約一念長作膏火煎滅然不能以一日  
寧復如君之六年泉無晝夜盖有本潦有朝夕繫無源  
歸來試與友朋道言之孔易行維艱厥今人物眇然甚  
天道豈不於君還友朋請書為君壽更祝養素勤加餐

董侍郎居誼生日

后皇一念根至仁地雖南北民吾民一二指擣不可信  
彼動此應關諸身人言犬戎相噬吞彼蚌鷸耳吾漁人  
大國信誓方重申時遣升勺蘇窮鱗有狼其心不我思

囊書赤白驚嚴宸帝曰可矣予其征臣某奉詔之淮漬  
臣某董師留漢濱西南憂顧誰其分我有從索之親臣  
時其動靜制主賓自閫以外維將軍邊頭赤子方寢薪  
旆旌悠悠鳥鳥馴將軍羽扇白綸巾且將沉靜弭放紛  
邇來世道波沄沄士為欲縛迷天真開禧戎首終身焚  
未聞先事人有言大官一喟和者羣前而和之後云云  
厥今狂獬先狺狺事勢不與開禧倫方拯摯獸招飢蚊  
此何為者祇自塵志士憤惋三軍顰置之不治虎患存

治之不勝桃蟲拚勝之不盡窮獸奔盡矣復與誰為隣  
譬諸白黑方交枰彼據腹脇吾邊唇養成持勢猶不均  
况彼攻奪吾逡巡局勢往往隨時新不有妙手誰彌綸  
人才生世厥有因帝資天假崧降神一心可以位乾坤  
浮雲軒冕何足論祝公早還要路津并包衆智資多聞  
倡明大義清妖氛攜持令譽歸麒麟蹇余不能康世屯  
浯溪有石高嶙峋儻能奔走東郭純

王總領鉉生日



皇天覆后土藐然中為人職職萬同宇何所非吾仁一  
二指搖耳動且關嘖呻置之非害事尚欲求其信矧今  
我赤子犬羊所噬吞養之將遺患迫之幾寡恩猶以赤  
子故未忍窮追奔蠢彼不我德羽書驚嚴宸帝曰斯可  
矣戎首將自焚一軍戍江介一軍留漢濱雨中徹桑土  
火後憂突薪又念蜀上游擢才餉吾軍蜀力如蝸涎僅  
足以濡身云胡走荆楚坐視空川秦天下本一家奚必  
爾我分獨憐去天遠緩急呼不聞公今從此升於國擬

世臣家有憂民譜切磋及茲辰直前明分義欲立思本  
根豈但無怨公此志長光新抑使蜀父兄壽公以峨岷  
歌詩三十五韻送前知隆慶任侯逢赴召

向來虎豹蹲天關啄噉人命無敢干任侯于時外小官  
有筆如刀剗權姦權姦未夷骨先寒有開天誅亂旋刊  
寘我宗社于山安忽焉倚伏不可搏天心克復理好還  
是時增秩綸言頒扶輦義烈增壯顏邇來十載國多艱  
思以吉士儀清班侯今以選賜之環進退語默人所矚

侯以時考以事觀慶元眎今奚易難浮騖妄轍紛多端  
大車檻檻長自閒中原戰塵暗河山行人載書墨未乾  
深仁大信而敢奸彼民玄黃走壺竈我復翦刈如草菅  
惟皇上帝憫人寰嗚呼言之鼻辛酸侯兮去去心體胖  
允矣直道非俗觀士所欠者非朝冠要令反覆耐久看  
前陳函與攄肺肝且使志士興長歎謹言此士嘗譏韓  
始終激烈心如丹寘名大小任公間

領客君子軒木芙蓉盛開分韻得紅字

白煒司節青女戒霜草木落而變衰春秋忽  
其代序偶偕勝引往踐蕭辰得之若驚寒英  
蓉於木未懷哉無數知松栢於歲寒客有誦  
韓公叢紅之章或遂舉白傳車斜之例觥籌  
多又詩令載嚴既訖賡酬寧無序引

天公富萬有盈宇何充充秋風一搖落所得緣手空忽  
於臞悴中覩此寒露叢天然真富貴送盡人間窮雅傳  
與騷經凡卉亦見容胡為抱昭質一盼獨未蒙或訝木

末寨或比水間紅至近前上處至明日方中碩人亦俟  
俟於此猶不逢莫我知矣夫佇立看秋風

重九後三日後圃黃華盛開坐客有論近世菊  
品日繁未經前人賦詠惟明道嘗賦桃花菊  
外此無聞焉因相與第其品之稍顯者各賦  
一品某探題得桃花菊

南陽有佳人被服長脩姱黃中粲有章秀外青無華朝  
飲晉柴桑夕餐楚長沙惟與高人處恥作流俗誇玄都

有俗士品格固爾差遺之以潘沐強欲相塗搽南陽笑  
謝遣於此我何加遊女蕩春風漁人眩紅霞爾比予於  
是豈欲相疵瑕卿自用卿法吾亦愛吾家寄聲謝程子  
為我刪此花

次韻薛祕書紱見遺玉臂格謝書則堂扁額

人心之精微未動孰為判邪正介然形君子小人斷熙  
熙大雅歌洋洋關雎亂或覘時安樂或識世屯難是惟  
言出口矧復書脫腕至著恢人文至微極幽贊或者藏

其心外飾徒璀璨誰知敬肆間德之所聚散卓哉符溪  
老吾道資禦捍萬殊錯揉中獨識一理貫反躬事省察  
憤世興寤歎揭堂闡斯則絕識陋秦漢於余或有所相  
謂畫可玩無物報瓊瑶作詩附筆諫

飛雪亭

自荆入蜀路險絕墨猿聲中膽欲折萬州江頭舍舟楫  
又趣擔簦窮岌業危磴連雲如積鐵亂石砭足十九跌  
僕夫流汗馬吐舌遙望盤龍挂天脅懸瀑落巖噴霏屑

中間有亭曰飛雪十里陰風寒入髮人言此地無六月  
火雲射地人不暍誰知利欲所熏灼以身試險車結轍  
伐性焚和火如烈試於此亭解羈紲呼取大斗約甘潔  
一飲令君消內熱

張義立方得古井以木為甃命曰亨泉而求余

詩

井居安其地井通會其時地維人所宅時乃天之為方  
冬羣動息水德潛清漪而隨春木升環頂沃華滋性情



固下潤功用由上齊

音躋

孰若無事中一降一騰之是理

契天運達觀正在茲張侯得木井妙製參皇犧其間相  
生意似非俗人知湮廢幾何年而獨與侯期書來屬共  
賦此理難下詞但於井之象發我深沉思且如初升五  
泰通人所資乃於巽入坎中含兌承離通塞靡自遂睽  
遇若有司坎惟生於一孚實以為基世途自亨否我德  
無成虧屬侯善疏淪毋俾纖塵縉不食吾不即食之吾  
不私小大隨所汲辯義而審施客來問出處為誦亨泉

詩

重陽分韻得放字

層雲生夕霏寒雨濕青嶂平生愛九九誰謂不可尚  
盈盈黃菊華采采鬱金鬋點檢襟袖間清芬固無恙  
門前秋陰陰席上春盎盎惟餘憂時心忽忽未肯放

鶴山集卷三

欽定四庫全書

鶴山集卷四

宋 魏了翁 撰

古詩

補和李季允臺去秋所寄凌霄觀詩

天高山圍坐露下月滿樓其間倚闌人古今入雙眸戒  
哉後時懊迨此先民憂匪緣冀求魚懼易或喪牛瞬息  
起萬夫朝暮食千頭金湯蔽遮地我豈為一州餘功事  
層觀翬飛半空浮簾開六合曉杯納萬頃秋燈火背城

市煙霖俯林洲遐晞到冥鴻吟思追馴鷗寄聲鶴山峨  
奪目珊瑚鉤因思去年夏狂魂盡羣遊婪酣飽溪壑磊  
砢豐渠首諸公正錯節如築于道謀微君且柔之尚保  
國邑不岌業變帖妥嘯吟起懽謳宜恢竒傑觀快此夷  
懌驕獨憂解成緩萬古同一流君毋觀上遊觀上增歎  
愁南有壺聚榛西有耕耨耨北有不庭方東有不寧侯  
君看此風景便謂無事休天心果何如年運不我留相  
期懋明德事業貫顯幽

汪漕使即梅圃作浮月亭追和古詩余亦補和  
一元播羣卉其氣清如馥詩人競稱許胡然於梅獨黃  
宮播雷鼓玉管動葭轂惟梅命於陽清艷照樸藪正冬  
白堆牆初夏黃遶屋純乾稟自高奚止香百斛又從晏  
陰後仍作來年復思君為築亭揮弄月盈掬可敬不可  
玩醉語懼三瀆

約客十有二人汎舟東山分韻得大字

樂莫樂良朋同胞瀛海內矧復聚此州此樂無乃太晨

策披層巔夕篙汎晴瀨羲和鑒余衷為我祛宿靄空碧  
墮清鏡青帝倚高蓋明矚照鷗心遐思絕鵬背信知好  
乾坤不出天地外人生兩儀間豁然如許大萬古同一  
流誰能與心會丁寧黃頭郎為我勉乘載直下涪武江  
合處看重允

次韻西叔兄日食地震詩

正月太陽食六月陰萋萋利沔階成間桑土為塗泥破  
山覆橋閣灌城壞河堤蜀地五六震積潦傷農畦梓州

暑尤異我興看朝濟出逢七十翁履敝衣無綈前行為  
余言老夫齒含齟閱事亦已多近聞何乖睽去年大官  
括隱戶父詈子詛妻悲啼大官深居那得聞小吏鼻息  
干雲蛻今年得少休北風苦淒淒番軍襲江淮將士驚  
噬臍四方靡所寄容身僅坤倪災異又如此寧保梁益  
西太守聞此言惕如履征輦又見廣文詩口呿心沉迷  
力能得為僅千里滔滔四海皆餘黎

約書院諸友過石洞津檢校隄役



天閭山頭頭江空石齒齒清霜肅宇宙物物露根抵是  
開明年春萬景從此始人事胡不然臨流方識水斷岸  
百尺懸赤子命如寄示人亦真切猶作秦越眎我憂不  
能釋人謂我俗吏吏安能俗人亦自人俗爾神天及游  
衍忠信在參倚是間炯然存精粗莫非事況逢道義友  
眷眷不余棄至理互相發俗氣安能滓夜寒人欲歸漁  
火颭清泚照我方寸心悠悠發長喟

至後再見大雪楊尚書汝明約登天開圖畫閣

分韻得平字

天公閔赤子踊為營杯羹寸白未云厭賜以一尺平微  
陽動黃宮萬寶隨孳萌蝗妖坐遠屏癘鬼亦就烹東鄰  
文昌伯志氣為我傾攜朋樂時豐舉酒澆空明忻忻各  
有適耿耿未忘情不知宇宙內肯爾同陰晴前時聞帝  
輦隨雪登山亭亭高一汎盼淮楚接神京新甦正露立  
舊戍方長征

送劉寺丞  
赴浙西提舉分韻得霄字鹽官縣

以海漂蕩命措置

君王位三極五氣咸宣昭有一弗余若引咎自己招如  
何圻甸間靈胥敢為妖母謂一指搗能使身無聊是用  
選膚使汝往鋤其驕將指得若人譴異不足銷水生乎  
天一陽實為根苗疏通乃循軌壅塞逾驚漂是理與政  
通更當省厥徭績成報天子鳴珮行青霄

閣學袁侍郎燮以朝鯉豢龍兩圖見寄索和朝  
鯉

物生宇宙間巨細統有宗鱗蟲三百餘厥長稱維龍  
霧彌六合神龍閔千重維時赤鯉公坐制纖鱗窮纖鱗  
何足言什百來追蹤亦有橫江鱗望洋喪其雄于于圉  
圉然等辨殊卑崇一鰕掉頭去愬然若將終三公不易  
介誰謂惠不恭魯生陋漢儀商皓嬰秦鋒行吾之所安  
匪以驚愚庸又如秦漢後俗學千載同卓哉無極論上  
配禹孟功吾言聊自警毋諂惟少通

恭龍

乾坤包萬有納納百囊畧人位乎兩間利與害為禦一  
氣貫四時五風甘十雨神龍以為畜擾御不予侮河有  
背負圖庭無滌流女義理之不明人情自疑沮範圍吾  
職分徃徃若違拒同室操戈鋌一身隔肺腑帝王豢龍  
意棄置那復取四靈非不靈有不得其所生息之相吹  
古今類如許古人體天意萬物我其主蟲莫知於龍拊  
循如士伍今何故無人亦足驗胷府聲和鳳來儀心平  
轡如組矧伊人中瑞治亂係默語欲入而閉門誰出不

由戶茲事關人心作詩附農圃

送袁都官甫知徽州

英英蓬省郎表表秋官屬  
劔佩行青霄揚且鬢雙綠  
掉頭不肯住去作新安牧  
班班萊氏衣粲粲學子服  
歸來拜郎罷堂前問涼燠  
新從天上來猶帶書傳馥  
問汝得人誰袖有兩圖軸  
驪龍挾風雨閃電注兩目  
甲系獨何術能使同猱鷲  
三十六脩鱗群鯁蕩相逐  
亦有曳其輪中行而獨復  
君家名父子厥理探已熟  
人生宇宙間亦

在適所欲義精無非事慮澹不翅足願明消息幾願神  
以養福遲子寬我憂書來寄陸續

送侯成甫歸蜀

鴈聲砧杵霜滿洲高挽大舶行清秋長安白日誤雙鬢  
故國青山明兩眸前宵大江半歸壑來歲侯蟲已坏窟  
無蹤天馬常往還不信人間有終屈

送楊尚書汝明知瀘州

新雁懷歸蘆葉秋離鸞感照菱花羞五更呼兒拭殘淚

淹速有命吾歸休殿頭三拜疏去意浩莫收內前宣辭  
賜顏色外間祖帳如雲稠往年長安道笑談取公侯白  
壁抵山車斷流黃金物屋花滿樓萬釘圍腰笏頭帶廷  
紳嘖嘖懸兩眸吁嗟此何物白盡人間頭二十年重來  
見此勇退楊瀘州平生志氣未肯傾卷回歸洗岷峨愁  
我徃送之門感事增百憂匆匆別公上車去怕鬼見笑  
君奚留

送鄭侍郎

損

四川制置分韻得蓋字



恭惟皇上心納納天同大明命輟禁游往撫蜀彫瘵蜀  
山在何許斜陽點鷓鴣背家住扶桑東復東却望斜陽鐵  
山外金頭奴子扼熙秦銀州兵馬衝蘭會使我六年望  
烽火征人穿空枕戈殺使我千里致鐘石居人輶釜泣  
粗糲縣官無蓄租百姓無藏蓋上有蒼蒼之高天卒然  
叫呼不可待閭外萬戚休只以一身佩我於公行無所  
贈筮言得咸為艮兌艮山本中虛兌澤乃上漑獨於九  
四論心體而以朋思為障礙願公書此象長於卧興對

蜀道青天蜀平地君侯一心即難易思耕亭前先鄭碑  
更看他年後鄭記

大理曾少卿煥欲見余近作錄數篇寄之以詩  
為謝且云連日瘡瘍作讀余文而愈因次其

韻

西風蕭蕭吹鬢急獨立長空倚天壁俯看滄海環九州  
仰視青雲行白日夜歸蟋蟀鳴秋床觸處萬寶西風香  
而余生世竟何事孔翠眩影蜉蝣蒙冥心宴坐自探測

善利幾微如白黑江西夫子最知心欲往從之后土濕  
忽來詩句懸清風拱揖孔孟摩瘠癰便思載酒巾車童  
一夜壯氣千星虹

送任大卿逢知漢州張少卿午知眉州

冬卿懷紱行清秋又送南卿歸三州寄聲三州之父老  
從今安用思故侯朝廷擇守重於昔親擢名卿畀華職  
兩卿更是歆歷深元把麾來復麾出雙騎紫馬去朝天  
羈金絡月凌虹煙逡巡似惜錦障泥急流欲渡不肯前

好官豈為多榮祿兩卿之歸得吾欲昨夜流星聲撼屋  
光芒照人不成宿起看北斗行雲端驅策四運無停鞭  
旁穿上透多風寒九州霜露方漫漫人間分位各有制  
行得一分一分是兩卿去矣吾亦歸多為天公憐赤子

十二月二十日領客登介亭分韻得梅字

晨鑣載賓從披霧陟崔巍宇宙斂盈握江湖大容杯  
屏顏石丈人玉立山之隈山前大第宅馬頭漲黃埃  
獨此抱昭質蕭然侶寒梅有客以問余豫為地為雷雷出地

為奮何取於石哉人以動為境沄沄不知回而能介然  
存神氣斯有開相對得深省欲歸重徘徊

四月二十日領客尋龍井前盟以雨陰晴未定  
不果往買舟下西湖步至玉泉觀魚分韻得  
東字

前期戒賓從再候蘇長公晨炊馬亦秣宿載車既童飛  
廉何方來橫出雲半空便將龍井泉換卻西湖風公非  
閱清境乃似開其逢煙柳夾大隄拳荷點清穹水涵亂

雲白露濕殘照紅不是我輩人此味誰與同神閒等喧  
寂意適無西東觀魚滋有發歸騎春風中

童按石鼓  
文亦作同

六月十四日後殿侍立新永康太守盛嘉甫朝  
辭奏事詞氣懇惻上為嘉納嘗隨筆記其事  
今鄉人祖帳分韻得西字遂書以贈行

嚴精伐鼓趨晨雞龍媒戒伏喑無嘶宰臣奏事左城降  
史臣曳履東階躋永康太守臣申之上殿音吐于虹蜺  
曰臣前領大農簿試郡得請今當西韉人求通反其使

金人匿壯招吾攜勿言殘金繼前好將貳韃韃搖青齊  
時將有反事有間翫歲愒日憂噬臍皇帝瞿然曰是是  
伸頤頷首天聽低貼黃更請戢叛將褒恤死事不可稽  
陛下亦聞西事否昔號險阻今多蹊散關皂郊已平地  
白環黃牛猶潰隄分臺列閭越秦視體統渙散人情睽  
上云私意誤大事諄諄切切重提撕申之又言故臣丙  
昔嘗有德于坤倪上顧指臣曰安丙申之頓首如含悽  
紛紛交情異生死獨此推本祛羣迷臣時張拱立帝傍

螭頭恨無千赫蹠為王留行力不足戴目處此羞梁鵷  
官無小大莫非事勇為天子綏羣黎天如有意聽臣歸  
問天重乞青玻瓈

楊仲博約生日 七月二十四日

金街隆隆曉鐘動倚馬禁門續殘夢夢驚風雨搖江霏恍  
如秋浦哦詩時覺來絲絲理前緒猶記平時蟹魚句

十五年秋

池州遇生日大風雨中嘗賦詩云平時雨足蟹魚肥云云

是日江風吹倒山船頭白浪

高黏天兩家兒女攬衣出草草杯盤作生日自從撲椒趨



帝京二年不見波濤驚不知風色今安否但見朝朝侍明  
主銀鞍白馬上晴空鳴鞘戒仗天無風朝回為君慶初度  
才上心來到秋浦君今去作什邡侯歸興如風不可留只  
虞江上風色惡不似帝城鎮懽樂高樓大第插雲霓煙  
花眩眼明春暉吾儕且可飲勿問尚書期為我歌毋庸歸

送杜兵侍

孝嚴

以華文待制知遂寧府

敝貂衝寒馬聲濕餘杭門外送歸客去年曾送六朱幡

楊濫州任漢  
州張眉州

今年又送四千石

成永康  
及杜

更有三令相後

先是時有同時得縣者楊伯洪楊仲博杜陽安采不盈筐去如織濛濛風雪

人氣薄漠漠煙塵劒花蝕獨立長空倚天壁幾度乞歸

歸未得貳卿犖犖天與姿不肯隨俗相脂韋聲名早落

虞舜聰霞裾雲佩明春暉虞舜已死不復返雲埋蒼梧

天地悲萬物興歇各有期人生出處寧無時攬裾結佩

下霄漢苟得吾志官無卑史臣昨侍玉皇案愛民一語

何孜孜公陸辭日上云卿到蜀中切宜勉力愛民願公領此深長思民力竭

矣誰其知更須同志共此事則公且去吾亦歸

送楊仲博約歸蜀

江頭送客雪初晴  
木葉脫盡山空明  
天高地迥着行客  
昂昂野鶴相似清  
曉空霜唳三兩聲  
扶木枝上陽烏驚  
豈無枯蚓若殘粒  
寧肯俛首雞鶩爭  
伊人伊人此為客  
不是伊人招不得  
固有比鄰不往來  
那能萬里相追逐  
瀘涪江上初戒舟  
荆江夏簾赤壁秋  
長江鏡滑無纖滓  
致君肝鬲爾許侔  
竟成何事客先發  
羸得滿頭星星髮  
丈夫身在復何憂  
莫作無相見期別

送黃宜州寔之郡

皇帝親政之初旬史臣了翁侍嚴宸宜州太守當就國  
袖出諫疏前開陳炎荒僻在飛鷺外陞下一眄同吾仁  
毋云指擿非害事往往四體為不仁臣請選侯如中州  
更飭膚使時咨詢但令正身以率下炎荒雖遠畿甸均  
皇帝顧謂汝可往布宣德意安吾民黃君下殿再拜謝  
盡以聖訓關史臣史臣拜手筆之冊以君所聞還贈君  
維今貪競習成俗公私已屈憂方新紀綱法令不敢知

恃以立國維蒼昊蒼昊茫茫不可問人情忻戚天笑顰  
願君體此深長思便以聖訓書諸紳心誠求之莫非事  
子苟不欲民無貧

送秦秘監季禎以顯幕知潼川

杜侯歸未幾又送秦侯歸錦衣赫相望里閨生光輝僅  
存二三士去意不可羈王張屢乞身余亦五請祠豈不  
明主戀去就各有宜昔歲語杜侯志得官無卑近忽省  
前誤熱突無寒煤君門天九重赤子命一絲詩書謾脹

腹字字不適時俯瞰大江流  
仰看蒼雲移悠悠未有屈  
蹙蹙安所馳昊天豈民憎  
翻覆不可期願隨力所逮  
必以誠求之求之有弗得  
況忽相瘠肥臨分重回首  
吾匪懷吾私

送張匠監

忠恕

秘閣知贛州

西南間氣忠獻公一生心事  
天與通才高志廣無處着  
獨倚衡疑望關洛九州風露  
方漫漫卷回殘夢歸餘干  
惟將一念遺孫子長與世間  
立人紀宣公端明今在無

我生不識慚非夫寧知中歲遇行甫歷歷典刑猶父祖  
試從微處覘經綸中邊玉潔無纖塵大河滔滔恣羣飲  
逡巡獨惜障泥錦曉庭戒仗喑無聲制纓振鬣時時鳴  
京師郎吏自相語張公立朝我良苦不知書疏何所言  
每一論奏人爭傳好名之人能遜國而於豆羹見詞色  
反覆耐看不可瑕此事無素能然邪我從同朝一千日  
見公造次皆是物寄聲為賀贛州民朝廷為汝輟爭臣  
却須更問蕭太傅中朝外郡誰當慮

約漕使泛舟東郊坐客十人分韻得江字

微雨爽晴昊柔風渙清瀾空明山四坐字靜天八窓筵  
言得幽真此意誰與雙使家我風調賓友俱同腔高談  
風清境勝韻眠空缸東西南北人偶此同一邦坐數雲  
晶晶起看水淙淙古今聚散地浩浩如此江餘霞照寶  
瑟明夜欺銀缸維舟未肯鼓歸夢驚蓬蓬



鶴山集卷四

欽定四庫全書

鶴山集卷五

宋 魏了翁 撰

古詩

肩吾摘取傍梅讀易之句以名吾亭且為詩以  
發之用韻答賦

三時收功還朔易百川歛盈歸海密誰將蒼龍挂秋漢  
宇宙中間卷無迹人情易感變中化達者常觀消處息  
向來未識梅花時繞谿問訊巡簷索絕憐玉雪倚橫參

又愛青黃弄煙日中年易裏逢梅生便向根心見華實  
候蟲奮地桃李妍野火燒原葭莩茁方從陽壯爭門出  
直待陰窮排闥入隨時作計何太癡爭似此君藏用密  
人官天地命萬物二實五殊根則一圓形闔闢渾不知  
卻把真誠作空寂亭前擬繪九老圖付與人間子雲識

五老峯前訪梅招鶴  
舍余肩吾作九老

次韻永平令江叔文鶴山書院落成詩

天運驅人不覺古道違時時不學王捐隋脛回荆山

昭質依然未經琢因思胥靡逢殷宗精神動悟聲氣從  
礪舟霖雨到梅蘂變化氣質天同功朝歌屠叟無與語  
一日投綸見明主大車檻檻行周道輪輻中規箱中矩  
人生天地同一原自誠為聖明為賢地殊世遠猶合節  
矧此同宇相周旋自從澆風散遺直世不乏材無匠石  
未能登車習射御人人自視郵無恤出門浪戰觸與蠻  
半生少得須臾間不為夷甫辱汝水即似介甫逋鍾山  
古人灑掃先庭戶豈問他人莫余顧只憂原頭欠湔滌

才見天根便呈露人言陰濁勝陽清陽一陰二分三亭  
誰知陽德本無間根心枝葉長相親君臣大分雖有止  
終不能忘乃天理世無我知將自知不待雷風問諸史  
投沙屈賈占所歸九州博太歸何之雖云忠憤語傷激  
律以洙泗猶津迷前村虎嘯晚風起跼鵲酸嘶雁將子  
君恩未報臣憂深暇起壺頭較鄉里江公勸我姑少安  
新詩媚好如璧環敢輸憂誠謝慶語仍戒牘史母抄傳  
生朝李肩吾貽詩次韻為謝

肩吾作詩慶五十矜我顛躋授之繫因思五十義最精  
造化機緘斯出入君看五位相生成前盪後摩如授揖  
至於五行豈有窮澤火趨新承井汲作聖工夫方自茲  
為人生活知非急昔人於此歎始衰血氣雖衰義逾集  
蹇余不學晚知非方把斯心驗存蟄獨嗟道遠莫致之  
願與始終謀不及

次韻李肩吾讀易亭山茶梅

梅華鶴羽白茶華鶴頭紅拱揖鶴山翁如授宗人同山

間兩賓主窮極造化功易終得未濟曹末觀幽風或嗟  
生處遠不近扶木東誰知天然貴正在阿堵中喧寂四  
時耳寒至室斯穹冷眼看千古聲色沈非熊

再賦

淘金亂川綠伐炭燒山紅自為天一隅奚翅地不同米  
賤衣弗費四民罕全功夫到華卉未至澆淳風老梅  
委林莽洛珮遺丁東茶華新移根脫命斤斧中焉知貴  
然者秋毫皆蒼穹觀物弗之察吾欲問黃熊

鶴山書院前為荷塘三即其小嶼築亭久矣春

後八日始榜曰芙蓉州

巖風吹衣落南土手批魁猱藉封虎緣山跨谷三里城  
架竹編茆百家聚天公似為羈人謀閉藏佳境城東陬  
介然用之便成圃下眎更得芙蓉州水間木末高下照  
名字既同形亦肖自從羸豕伏羣龍紅白相輝轉明耀  
人憐風雪拘系之委棄衰草蟠寒泥誰知炯炯含內美  
正於槁瘁生光輝大書三字為吹送喚起渠陽百年夢



卻疑二華癡絕人身既隱矣名焉用

再韻和者盈軸次韻謝之

文華滅質甚塵土物欲戕生劇豺虎三年拄舌坐林臯  
日月往來雲散聚芙蓉自與詩腸謀雖無顏色媚涂陬  
夢隨春草撩客兒手挾雲錦分潮州平生恥作山雞照  
對此忘其為不肖為華破戒哦七字殆似五噫發梁耀  
李君不為揜覆之喚取奚錦披封泥繯車引出萬絲緒  
衣被山谷春無輝山中華木迭賓送人把榮枯同幻夢

卧看芙蓉生未生滿目天機供日用

通道朱宰求時齋字李肩吾賦詩次韻

朱君問時齋為誦義文書史終伏剝果乾始函坤輿坎  
離玄藏宅遇復更踦閭物理消處息人謀密中疏即茲  
貫千古何所非廣居是以無妄時不耕獲菑畲

撫州崇仁縣玉清觀道士黃石老工古篆以李

公父書來問字

聖學不嗣千餘年併與小學遺其傳其間明道寧乏賢

謂書小技

藝也揚子通天地人曰儒通天地而不通人曰技

姑舍旃十字九外

不可鐫楮生墨墨色有寃動以經史為執言豈知魏晉

幾變遷況今經字宗開元請觀未有韻書前訓纂字林

形相沿形聲迭推義乃全韻書既作人趨便未能書法

窮根原但以聲韻求諸篇形存聲亡韻亦牽叔重少溫

工磨研二徐鄭郭相後先書法賴此差綿延許李焉得

無謬愆楚金分韻猶拘攣若更舍此徇俗妍不學操縵

求安弦玉清道士來臨川用意周鼓兼秦山携書過我

渠江邊試令立柱與畫棧畏闌磯礎棄桶掾已能諧世  
而取憐猶欲度外求方園眉山夫子思涌泉相與共講  
扶其偏道士捆載明當還更以一語申惓惓能於此處  
知其端事事物物誰非天九章八卦莫不然一毫人力  
無加焉

題尹商卿起宗自信齋

虛靈一寸心至遠而至近真能位天地信可為堯舜不  
以利欲熏則為習俗引怙怙弄文墨若若誇綬印聖賢

豈我輩位育非吾分亦有識其然責泉於九仞人言力不足我謂知不盡商卿聞吾言其信其不信

兄子高斯得赴廷對

九十九峯矗天起家在前峯夕陽裏蠻徭虎豹斷行人  
小市寒城淨如水驩傳有客闖然來搢衣視之吾兄子  
云從諸侯貢往備天子使來時吾父為我言女之靖州  
問安否靖州苦好脩女從得師友世方白首聲利場父  
紹子承乃如此柳陰花影春風香喜極無言澹相對家

學既爾殊天資亦云美自淹寂寥無可贈贈以客中一言止吾聞古之人仕學皆為已上不可欺其君下不忍虛其類此豈有為然凡以自靖耳我之行止命於天下四方難豫擬且將自靖獻于君無限功夫歸語爾

丁大監文伯得余近作讀之疾愈以詩見貽

黔巫之南谿水滋山麓石惡不可治崇寧邊臣務廣地山刊石斷林木斯其間掌許號為郡如以土偶安鬚眉中州人物猶此任累臣舍是夫何詞況於風氣少疵癘

且幸習俗無澆漓飽餐賤米溫舊讀書味雋永忘其疲  
坐看歲龍度丑戌幾見秋月弦虛危都梁有吏雲端來  
持書火急如符移美人家在九芙蓉門牆突兀那可窺  
聯緘參牘夢邪非一年兩度劃見之我詩但能愈君疾  
君解與世醫狂癡乖逢休戚信有命歎上不使非知醫  
先立春一日電雷雪交作程叔運賦詩次韻

自從日馭行牽牛四十五日為春朝誰驅阿香送劈歷  
更遣玉女來姑瑤

山海經玉女居姑瑤山

從來雷雪不兩立有如

皋禹於驩苗閭然方駕朝正月是反常性皆為妖陽孽  
於子達於寅蟄蟲欲動寒魚跳蒼龍久移舊歲次朱鳥  
亦向新年杓如何陽伏不能出陰氣所沴如沃焦相摩  
為電搏為震始初隱隱如迢遙轟然一聲到七箸驚魂  
忽忽不可招須臾為雹又為雪寒威挾勝光宣驕春秋  
紀事且云遠紹興狄難幾難調春秋魯隱九年及近世紹興三十年正月有此異故  
云乃今此異已累歲卧治四海猶衣袍徒令志士歌且  
謠無人采寄觀風輶



朝字韻詩諸丈倡酬未已再次韻

風挾重陰牛戴牛  
電雷雪來終朝詩人隱憂寓酬倡  
清輝錯落欺琨瑤似驚一日四變異須省二氣同根苗  
非陰能勝陽不競非物能青人先妖炎精未振剛受畜  
睢水晝適成臯與卑同跳一從憤排剛浸長幹握地軸旋

天杓山中不知此何時祇睹此象心為焦累臣九死何  
足恤頑雲蒼慘天關遙澤中但知賦鴻鴈天上無復歌  
祈招二音醉頭新酒魂欲馨牆根新薺花如驕便思傾壘

笔鮮鯽不妄為取琴徽調江張程子同一醉芳草為藉  
天為褥干戈滿地不忍見恐調老弱征商輶

送程叔運高不妄西歸

平生為人謀必以正學進必以直道行聞者或相靳子  
以正教我而子坐排擯跼為伴羈酸再見渠陽閨吾心  
固曉然其奈無以訓紹定二年夏臨軒策羣俊似聞甲  
乙選參錯吐忠藎其間親與友斯德及叔運俱負康時  
略恥為諧俗韻後先來過我雙壁陡清峻從容扣所言

何以承大問聽之不盡篇肱口復縮頸予方以是黜子  
乃以是奮斬者姑勿道而予益自信人能位天地人可  
為堯舜氣合如塗塗道同如印印勿憂人不知長恐已  
難盡春情撩客夢歸思不可忍各趨青油幕新發蒼梧  
輒正學予所知申言以為責

湖北提刑林寺丞岳赴召以書索詩

鏃金伐鼓催行舟欄街祖帳雲如稠祥刑使者入奏事  
詔書趣發不可留居人爭門挽衣住行人十步九回顧

公言為汝五年留便是數旬終一去居人向前為公語  
情知不是留公處一春風雨寒淒淒牛羊滿地鴻酸嘶  
乾坤爾闊無處着惟有此地恬不知桑麻鷄犬桃谿曲  
身住主家數椽屋卧聽前江風雨聲自嗟身是如天福  
公今歸去作大官連雲廣厦千萬間我時豈不被公賜  
天高卒卒難為攀吾儕小人腹不憚再公祝公今攬轡  
行原隰澤地相臨看不足明朝歸坐京師宅深院重門  
壅休戚願公莫為一身惜須念同胞頭戢戢春風滿淚

情轉惻道旁過者聲喑喑我時困卧五谿東一日八九  
陰濛濛有來道前事耳目為惺惚更將百壺扶醉膽喜  
餘鼻息陵煙虹欲輸一言不能措以公所聞還贈公

中秋無月分韻得狂字

狂雲妬佳月怒飛千里黑  
此東坡詩也翁殆用韻耳

金低辟老火月琯行仲商是為陰之中正與日相望浮  
雲橫相掩人謂妬且狂彼雲初無心此月亦何傷水月  
本同體其中根於陽炯炯含內景隨時發輝光天機之  
淺者為人作閒忙

九月分韻得寒字

奇月必用重誰與開其端貴陽而賤陰於此亦可觀況  
於五陰後蒼龍挂高寒林疏山骨瘦宇靜天容寬卒然  
遇九九黃菊紛爛斑且開五言城聊寄一夕懽萋其義  
熙後甚矣天寶間陶杜千古心知者良獨難

送吳門葉元老歸浮光

予以戇愚抵戾放之蠻荆去國之日自邇臣百執事  
下至博士弟子員都人士祖帳餘杭門外連日不絕

臨安尹白宰相致餽書具四大舟送至丹陽所過監  
司帥守將迎如他日予謝以疾而不得免焉入靖靖  
守洪文惠公之孫倬遇之如使客而有加四方之賓  
友從游者日至行李之間無虛月也予皆固謝弗聽  
吳門葉元老識度器藻夙出儕類嘗受學于陸伯微  
具有師法所交多天下賢士予因陳正父識之傾盖  
如舊交一日匹馬數童來自浮光為予數月留每旦  
聚友讀書元老從容出一詞率中要會談古今治亂

人物優劣山川險易下至甲兵良窳米粟少多之數  
皆探原索委盖有志之士也予每閱前史凡喪人遷  
客必使守隸防夫極之於其所往至則廄門掃軌屏  
去書謁人或追送而遠省焉則史冊必書之為美談  
其在今日不惟不加之譴或反以是見稱於時賢見  
用於當世嗚呼非從事於學志立而氣彊者不能辦  
此非祖宗仁厚之積繇世歷禩愈蓄愈深亦無以致  
此元老將歸省其伯氏乃與共學之士酌酒餞行各



為七言古詩一章予為序所以作云

龍標之南路窮絕  
峩峩羣峯倚天脅  
頑雲壓谿鳶跼翅  
很石橫空馬溝血  
葉君尺箠度崔嵬  
朱霞白鶴雲端來  
蠻邦自昔少此客  
問此胡為乎來哉  
曉窓共話羲文易  
千古聖賢心歷歷  
有時舊習未全忘  
閒倚銀河弄詩筆  
銀河化作霜霰飛  
蒼龍移入天之西  
彭城風雨撩客夢  
君起謂我吾其歸  
牛羊凍卧鴻酸嘶  
九州博太君安之  
人生行止各有時  
願崇明德慰遠思

題東歐王友直尚友堂

士恨生世晚不為三代民誰知伊傅至孔孟亦學古道  
嗤時人豈惟三代時堯舜萬古師猶云若稽古不知古  
為誰氣數有詘信義理無終窮雖居堯舜地常有一簣  
功嗟哉秦漢後去聖益以久縱有間代英僅為時儒首  
況於隨世就功名甚者諧俗攫寵榮此於聖門直蛙蟻  
已謂斯世無與朋多知正名懼不知轉矜負亦云知矣  
恐未然須驗此心之權度有師舜文學周孔有擬管樂

明申韓亦有是商鞅亦有趨異端若言氣合即為善是中更要分明看

贈造琴道士劉發雲劉亦解致雷

劉師攜琴來自言有術驅雷霆聞之輒然笑人心未動誰為聲陽居陰位陽行逆日循陽度日數羸必嘗凝聚乃奮擊不有降施誰升騰劉師攜琴來為我鼓一再行若知雷霆起處起便知音是人心生

洪士龍以洪舜俞考功所作竹洲精舍記見問

考功記竹洲所業在淇奧謂學與自修此何取于竹士  
龍來諗余試請言其目天地之大端松篁受命獨陰陽  
迭盈虛表裏更見伏厥象肖坎離厥理寓始復榆杏柞  
與檀四序所宜木此獨貫四時不受寒暑觸示人人不  
察但識霜更綠誰能淇之上興寓三反覆形氣元發明  
顯微相貫屬嗟余粗知方倚杖看不足安得兩洪君試  
同煙露宿

張永平鎔作亭于渠河之右予請名以觀而通

守江君損賦古詩二十有二韻呂落之用韻

和答

渠河有水清且漣弄丸之暇遊其間風輕沙暖鷗忘機  
天開日烜魚逝釜山中不知歲月改春洲六度聽絲蠻  
聞人昔遊不到此岸容山色如有冤永平教孚訟亦簡  
為我卜築河之干臨流興懷歎不足因思孔聖感逝川  
豈無日景自北起亦有天運從東旋風霆流形草木賁  
星辰垂象郊原寬乾坤坎離更見伏春秋代謝相回環

雖將此理醒羣瞶更向川上觀微瀾存神過化義疊疊

行著習察心閒閒子思淵淵達天德子車混混窮原泉

東流不休發呂氏

呂不韋以水泉東流日夜不休為天道之圖

潺湲遠望悲

屈原

九歌荒忽兮遠望觀流水兮潺湲

聖賢分量已差等後來承誤滋

可歎或嗟年衰勸努力或謂時逝宜遊盤須看龍見水

歸壑又識雨降雲蒸山陰陽翕闢本無間俗儒但作死

生觀河南挺生二程子指示道體鑄冥頑人能於此發

深省致知格物茲其端神但聖伏二千載是心長與江

瀰漫文通為揮五色筆大篇長句垂不刊春風沂泗儼  
在此居人莫作渠陽看

次韻廬陵劉時見懷

夬終伏剥果畜極逢天衢否泰反其類艮止與動俱此  
道固曉然人情不同趨兩目自安障狂童為子都羈金  
絡明月騏驎旆疲駕靜觀若有得知非降才殊但傷此  
道違獨行嘗寡徒邂逅知我者聊足以自娛

鶴山集卷五